

Dragi prijatelji/ce,

Predstavljamo vam **oktobarsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **185** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

| | |
|--|----|
| Aktivnosti u oktobru 2018. | 2 |
| Planovi za novembar 2018. | 7 |
| Aktivnosti članova mreže..... | 8 |
| Saopštenja/informacije/donatori/pozivi | 21 |

Uživajte u čitanju!

AKTIVNOSTI ORC/HCA U OKTOBRU 2018.

Profesionalna orijentacija kroz pasoš kompetencija

ORC Tuzla je početkom jula pokrenuo projekat "Profesionalna orijentacija kroz pasoš kompetencija", podržan od strane Ambasade SAD u BiH.

Projekat će se realizirati do kraja ove godine, i pružit će podršku za najmanje 100 mladih ljudi sa šireg područja Tuzle (Lukavac i Živinice) iz završnih razreda osnovnih škola i prvih razreda srednjih škola.

U toku mjeseca oktobra, završile su se prve aktivnosti s mladima. Ukupno 105 mladih osoba, koje su se putem



javnog poziva prijavile da prođu set radionica „Životne vještine“ i „Vještine zapošljivosti“, uspješno je završilo obuku polovinom oktobra. Osim usvojenog znanja, mladi su imali priliku za dobru zabavu, te mogućnost razmjene iskustava i sklapanja novih prijateljstava.

Od 105 mladih, njih 20 je dobilo priliku da prođu savjetovanje za Pasoš kompetencija, te samim tim izrade svoju vlastitu mapu i na kraju savjetovanja da dobiju svoj profil kompetencija od strane savjetnika sa kojim su prošli proces savjetovanja.



“Objavlivanje ovog teksta je finansirano grantom Ministarstva vanjskih poslova Sjedinjenih Američkih Država (Department of State). Mišljenja, nalazi i zaključci koji su ovdje navedeni pripadaju autorima i ne odražavaju nužno mišljenja, nalaze i zaključke Ministarstva vanjskih poslova Sjedinjenih Američkih Država.”



CAT – GRAĐANI PROTIV TERORIZMA

U sklopu projekta „Know your CAT“, koji Omladinski resursni centar Tuzla provodi na najpopularnijim društvenim mrežama za mlade, održana su još 2 treninga iz oblasti kreiranja i upravljanja kampanja na društvenim mrežama. Svjedoci smo da naši vršnjaci, većinu svog slobodnog vremena provode na društvenim mrežama – pa se stoga rodila i potreba da im se približimo. Vođeni ovom idejom, mladi ORC Tuzla su u sklopu gore pomenutog projekta održali trening u Zvorniku i Vitezu za po 10 mladih aktivista.

Mladi aktivisti iz Zvornika i Viteza su ovladali vještinama i znanjem o kampanjama, sa posebnim akcentom na društvene mreže.



Rezultate naših treninga možete pronaći na zvaničnoj stranici projekta „Građani protiv terorizma“ : <https://www.facebook.com/CATBIH/>

Video: HEJT nije dobro došao u moj SVIJET!



U sklopu projekta koji ima za cilj borbu protiv nasilnog ekstremizma, radikalizma i terorizma, pod nazivom Citizens Against Terrorism, članovi ORC-a Tuzla su u snimili video koji prenosi online nasilje u offline svijet. Cilj videa je da podigne svijest mladih da zlobni i uvrijedljivi komentari koje ostavljaju na društvenim mrežama, portalima i sl. ostavljaju iste ožiljke kao i oni izgovoreni licem u lice. Glavna poruka koja se prožima kroz cijeli video jeste da, ako je takvo ponašanje neprihvatljivo u stvarnom svijetu, zašto je onda postalo tako normalno na internetu? Snimanju videa su se pored članica Omladinskog centra Tuzla pridružili i svoju podršku poslali i članovi Centra za omladinski razvoj Proni Brčko. Video možete pogledati na:



<https://www.facebook.com/CATBIH/videos/591328334620148/>

Omladinska grupa ORC Tuzla

NGO FAIR – Dođi i saznaj



Sajam nevladinih organizacija "NGO Fair" održan je 19. oktobra u gradskom parku u Tuzli. Sajam je proveden u organizaciji Omladinske grupe ORC Tuzla, uz finansijsku pomoć Instituta za razvoj mladih KULT. Pomenutom događaju se odazvala 21 omladinska nevladina organizacija sa područja Grada Tuzle, a zabilježena je posjećenost od preko 200 mladih ljudi. Mladi su na sajmu imali mogućnost naučiti nešto o volontiranju, saznati koje omladinske organizacije postoje, te kako im se mogu priključiti. Tokom održavanja sajma organizovane su i pokazne radionice na tri različite teme, koje su održane u Američkom kutku Tuzla. Teme radionica bile su: „Prezentacijske vještine“, „Predrasude i stereotipi“, te „Kako napisati Motivaciono pismo i CV“. Koordinator projekta su bili Mario Mrkić i Merima Čokić.



COOLtura

Projekat COOLtura realizovan je od 6. do 7. oktobra u Beogradu, u saradnji organizacije BUM sa gradskom opštinom Vračar i partnerima iz Slovenije, Srbije, Makedonije, Bosne i Hercegovine i Belgije. Veliki broj mladih je imao priliku da kroz metode neformalnog obrazovanja uči o značaju kulture saradnje i povjerenja među državama regiona.

U sklopu ovog projekta 6. Oktobra u Muzeju grada Beograda održan je EU Art Night. Ovom događaju, organizovanom u okviru 57. Oktobarskog salona prisustvovao je veliki broj mladih, predstavnici Evropske unije, ambasadori i mnoge druge zvanice.

Gosti su imali priliku da se u opuštenoj atmosferi žurke u muzeju upoznaju sa djelima savremene umjetnosti nekih od najpoznatijih umjetnika i umjetnica.



U ovom projektu su također učestvovali članovi Omladinskog resursnog centra Tuzla: Slobodan Blagovčanin, Medina Delić, Hamza Delić, Kenan Suljić i Benjamin Burek.

Koalicija za borbu protiv mržnje Tuzla

23. oktobra je u prostorijama Doma mladih Tuzla održan sastanak Koalicije za borbu protiv Mržnje Tuzla. Na sastanku su učešće uzeli i članovi Omladinskog resursnog centra Tuzla, udruženje MIOS (Međunarodno udruženje interaktivne otvorene škole Tuzla) i predstavnici Inicijativne grupe „Aktivno starenje“ Tuzla. Na sastanku su predstavnici koalicije predstavnike ostalih nevladinih organizacija upoznali sa dosadašnjim aktivnostima, a to su:

- Javno pismo svim političkim strankama (uzdržavanje od negativne političke retorike u predizbornim kampanjama),
- Testni upitnik za članove i članice Koalicije,
- Radionica na temu znakova, grafita i simbola (ova radionica je održana u Bijeljini 20. septembra),
- Akcija čišćenja Ilinčice koju je organizovao pokret Let' Do it koja je održana 14. Septembra.



Za naredni period je najavljeno nekoliko aktivnosti koje će koalicija organizovati, a to su:

- Održavanje manifestacije u Teočaku povodom 16. novembra međunarodnog dana tolerancije,
- Održavanje okruglog stola u Tuzli, gdje bi bili pozvani predstavnici MUP-a, komunalne službe i nevladinih organizacija, gdje bi se razgovaralo o grafitima koji su uvrijedljivog sadržaja i koji šire mržnju,
- Čišćenje saobraćajnih znakova, odnosno onih znakova na kojima su čirilična pisma precrtana crnim sprejom

Moć komunikacije



U srijedu, 3. Oktobra u Hotelu "Dorrah" u Tuzli održano je predavanje na temu "Moć komunikacije". Organizator ovog predavanja bila je NLP Edukacija.

Predavanje kao i "NLP Practitioner" edukaciju vodi Šemsudin Zaimović, prvi NLP Master Trener u BiH i jedan od prvih NLP trenera u regionu koji je priču NLP-a u BiH donio 2002.godine.

U toku predavanja saznali smo:

1. šta je to NLP i šta je to što ga čini tako "moćnim",
2. kako je nastao i kako funkcioniše,
3. koje su oblasti primjene NLP-a,
4. kako primjeniti NLP u svakodnevnom životu,
5. osnovne principe na kojima je baziran NLP,
6. kako NLP funkcioniše u praksi,
7. NLP tehnike za uspješnu komunikaciju
8. kako odabrati pravi NLP trening za sebe,
9. detalje vezane uz "NLP Practitioner" edukaciju koja se nastavlja u oktobru 2018.godine.

Na ovom predavanju učešće su uzeli ljudi iz različitih područja zanimanja: uposlenici, šefovi, studenti, profesori, radnici, učenici, predstavnici nevladine scene. Predstavnik ORC-a na ovom predavanju bio je Benjamin Burek.

Poetsko druženje pod nazivom „Iz mog pera“



Američki kutak JUNUB "Derviš Sušić" i ove jeseni ugostio je učenike i nastavnike/profesore tuzlanskih osnovnih i srednjih škola, koji se već sedam godina druže na manifestaciji "Ovdje stanuje lijepa riječ".

Organizatori manifestacije, koja je ove godine nosila naziv "Iz mog pera", su učenici i nastavnici OŠ "Novi Grad", zajedno sa Mirelom Avdagić, pjesnikinjom i profesoricom bosanskoga jezika i književnosti u penziji, i uposlenicima JUNUB "Derviš Sušić".

Učesnici ovogodišnjeg druženja bili su učenici i nastavnici/profesori osnovnih i srednjih škola sa područja Tuzlanskog kantona.

U prijatnoj atmosferi nastavnici – pisci prenijeli su svoja stvaralačka iskustva učenicima, saslušali ih, razgovarali s njima, ohrabрили... Među prisutnim učenicima naslućuju se već ozbiljni pisci, koji će u budućnosti sigurno njegovati ideju ovog druženja i, nadamo se, nastaviti razvijati sebe i unapređivati svoje stvaralačke potencijale.

Kao predstavnici svoje škole Benjamin Burek i Džananović Amina su ispred Omladinskog resursnog centra Tuzla predstavili i kampanju "Literatura kao Utopija", koja je bila pod koordinacijom naše Mirele Biković.

Kampanju su predstavili ostalim učesnicima, i sa svojim tekstovima, koji su bili napisani povodom završne manifestacije, uljepšali to druženje.

Coding Weekend



20.oktobra, u prostorijama Međunarodne škola Tuzla održan je događaj koji nosi naziv "Coding Weekend".

Događaj je imao za cilj uvesti mlade u svijet programiranja i arduino tehnologija kroz kreativne interaktivne radionice, te ih na taj način stimulisati da odaberu karijeru u IT sektoru. Svi polaznici su prošli kroz 2 sesije edukacije iz kodiranja i 2 sesije edukacije iz arduino tehnologije.

Edukacije su držali volonteri-studenti završnih godina elektrotehničkog fakulteta.

Event je organizovan u saradnji Asocijacije srednjoškolaca u Bosni i Hercegovini, i Asocijacije studenata Burch univerziteta u Sarajevu.

Na radionicama je prisustvovao Benjamin Burek, kao član Omladinske grupe Omladinskog resursnog centra Tuzla.

REDOVNE AKTIVNOSTI ORC I HCA TUZLA

Tokom oktobra radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA NOVEMBAR 2018.

- Nastavak implementacije projekta „CAT 18“. U okviru ovog projekta u naredom periodu naše aktivnosti su nastavak online treninga i mentorstva, te radovi na vizuelnom dizajnu stranica.
- Nastavak rada na projektnim aktivnostima projekta Profesionalna orijentacija kroz Pasoš kompetencija podržanog od strane Ambasade SAD u Sarajevu. U okviru ovoga, dvadeset mladih će imati priliku da prođu savjetovanje za Pasoš kompetencija, te izrade svoju vlastitu mapu i na kraju savjetovanja da dobiju svoj profil kompetencija od strane savjetnika sa kojim su prošli proces savjetovanja
- Aktivnosti omladinske grupe ORC-a Tuzla



AKTIVNOSTI ČLANICA OMLADINSKE MREŽE BiH



Asocijacija srednjoškolaca u Bosni i Hercegovini

Ul. Mula Mustafe Bašeskije 7, 71000 Sarajevo
Tel/fax: +387 33 205 850
E-mail: asubih@yahoo.com
Web: www.asubih.ba

U mjesecu oktobru imali smo jedan od najvažnijih događaja ali i jedan od najvažnijih projekata.

XI Generalna skupština AsuBiHa, pod sloganom „(G)radimo za budućnost

U periodu od 12.-14.oktobra, u hotelu Hollywood u Sarajevu, održana je 11. Generalna skupština Asocijacije srednjoškolaca u Bosni i Hercegovini.

Slogan ove Generalne skupštine “(G)radimo za budućnost”, zaista je pravi pokazatelj spremnosti i volje ovih srednjoškolaca da kroje svojim bojama neku ljepšu, bolju budućnost.

Na samom početku održana je svečana ceremonija otvaranja, na kojoj su prisustvovali neki od prijatelja i donatora s kojima duži niz godina surađujemo. Među gostima našli su se srednjoškolci iz preko 60 lokalnih zajednica, predstavnici Fondacije SHL, Burch Univerziteta, Sarajevo Osiguranja, Vijeća mladih, Unije srednjoškolaca i srednjoškolki Srbije kao i mnogi drugi. Nakon otvaranja delegatima su predstavljeni izvještaji (finansijski i narativni) te su imali priliku učestovati u radionicama koje su, kako oni kažu, dodatno razvili njihove vještine.



Delegatima su također predstavljeni kandidati koji su se kandidovali za poziciju dopunskih članova Upravnog odbora i novog predsjednika organizacije.

Dopunski članovi Upravnog odbora ASuBiH-a, generacija 2017/2019. su:

- Matea Brkić (Brčko)
- Una Karabeg (Bugojno)
- Arslan Arnautović (Cazin)
- Ema Tutić (Goražde)
- Luka Ramljak (Posušje)



Delegati XI Generalne skupštine natpolovičnom većinom izabrali su Mateu Brkić (Brčko) za predsjednicu organizacije u narednih godinu dana.

Iskoristili smo priliku da ponovo stavimo fokus na jedan od naših najvećih projekata "Socijalni dan", te smo organizovali ulični flashmob koji je privukao veliku pažnju javnosti.

Skupština je trajala ukupno tri dana, a srednjoškolci su se vratili u svoje lokalne zajednice bogatiji za značajno iskustvo, znanje, prijateljstvo i sve ono zbog čega ova priča traje 11 godina i trajat će.

Socijalni dan 2018.

Srednjoškolci su još jednom dokazali koliku moć imaju i da žele krojiti bolju budućnost za sebe ali i za naredne generacije.

Ove godine je realizovan treći "ASuBiH Socijalni dan" kojim su nadmašena sva očekivanja!

Ove godine smo imali podršku od većine Ministarstava obrazovanja na kantonalnom nivou, Vlade Brčko Distrikta, što pokazuje veliku spremnost obrazovnih institucija za saradnjom u projektu "Socijalni dan".

Socijalni dan je jedan dan u godini kada srednjoškolci svoje školske klupe zamijene radnim mjestima. Novac koji se zaradi Socijalnim danom uplaćuje se u Fond koji se kasnije koristi u svrhe finansiranja omladinskih projekata. Ovim projektom svi uče i svi dobivaju.

Srednjoškolci kušaju rad kroz puno radno vrijeme, škole omogućuju svojim učenicima određeni vid praktične nastave, a kompanije ulažu u lokalnu zajednicu. Ove godine, 19.10.2018., učešće u Socijalnom danu je uzelo 1564 srednjoškolca iz 40 lokalnih zajednica, što je više nego duplo veći broj u odnosu na naš prvi realizovani Socijalni dan! Ovo je jedinstvena prilika za srednjoškolce da osjete klimu radnog prostora i vide kako je provesti 8 sati na radnom mjestu, te svojim angažmanom mogu pomoći sebi pri odabiru budućeg zanimanja i istovremeno omogućiti vršnjacima da realizuju svoje ideje.

Bez podrške srednjih škola iz cijele BiH ne bismo uspjeli ostvariti ove rezultate, koji su uvidjeli važnost ovog projekta, te dali srednjoškolcima priliku da svoj uobičajeni školski dan zamijene svojim prvim radnim iskustvom, koji će im vjerujemo ostati zauvijek u sjećanju!



Velika zainteresovanost srednjoškolaca i preduzeća nam daje veliki vjetar u leđa da nastavimo sa ovim projektom, ali i sa svim ostalim koji zaista dokazuju da se sve može kad se hoće!

Veliko hvala ide svim preduzećima kojih je ove godine bilo preko 600, koji su otvorili vrata srednjoškolicima i omogućili im da dobiju prvo radno iskustvo. Nadamo se nastavku saradnje sa našim partnerima i u narednoj godini, jer su se srednjoškolci kućama vratili puni utisaka i motivirani za dalji društveni angažman. Poslodavci za svakog srednjoškolca na radnom mjestu uplaćuju dnevnicu u Fond Socijalnog dana iz kojeg će se finansirati projekti srednjoškolaca u njihovim lokalnim zajednicama.



Poziv za projekte se otvara krajem godine, a ove godine smo realizovali njih čak 25 iz Fonda Socijalnog dana 2017.

I ove godine će srednjoškolci moći pisati projekte i na taj način dobiti mogućnost da unaprijede svoje lokalne zajednice!

Dva nova tima!

U mjesecu oktobru osnovali smo i dva nova lokalna tima, a to su Kreševo i Vlasenica. Ponosni smo što smo i u malim zajednicama uspjeli motivisati srednjoškolce da pokrenu priču AsuBiHa, te da se bore za svoja prava i sudjelovanje u donošenju odluka koje se upravo tiču njih samih.

Novembar 2018. U Asocijaciji srednjoškolaca u BiH

Na samom početku mjeseca novembra obilježiti ćemo jedan od najvažnijih datuma, a to je 11. rođendan AsuBiHa, koji se obilježava svake godine 4.11.

Nakon toga, najvažniji datum u godini za srednjoškolce, 17.11.- Međunarodni dan srednjoškolaca.



**Udruženje građana "C.E.Z.A.R" Srbac**

Zdravka Čelara 29, 78420 Srbac

Tel: 051 928 126

e-mail: zdravosrbac@yahoo.com

Svečano otvaranje Omladinskog parka

Udruženje građana „C.E.Z.A.R.“ iz Srpcu organizovalo je 4. oktobra svečanu ceremoniju povodom otvaranja omladinskog parka u Srpcu, koji raspolaže velikim brojem igrački i sprava za rekreaciju djece i mladih. Otvaranju su pored izvršne direktorice Tanje Šnjegota i ostalih članova udruženja, prisustvovali i brojni volonteri koji su bili angažovani na izgradnji parka, donatori i mještani, kao i načelnik opštine Srbac i drugi predstavnici lokalne vlasti.



Projekat izgradnje omladinskog parka pod radnim nazivom „Aktivno ljeto“ odobren je od strane Omladinske banke Srbac, kao jedan od 10 projekata mladih u ovoj godini koga su zajednički finansirali Opština Srbac i Fondacija „Mozaik“. Pomoć u adaptaciji novog prostora za mlade pružila je i Fondacija „SHL“, kroz projekat „Omladinski park“, kao i veliki broj donatora i mještana.

Omladinski park se nalazi na Bolničkom brdu u Srpcu, gdje živi dosta mališana koji su sa radošću dočekali svečano otvaranje kako bi isprobali nove klackalice, ljuljaške, tobogan, vrtuljak, sto za stoni tenis, koš, teretanu na otvorenom i druge zabavne sadržaje.



Ovaj projekat je prvi projekat ovakvog tipa na Srbačkoj opštini, budući da je zapuštena površina od 455 kvadrata pretvorena u prostor koji zadovoljava potrebe djece, mladih, ali i ostalih građana Srbačke

opštine. Adaptacija ove površine trajala je oko dva mjeseca, a radnim akcijama se odazvao veliki broj volontera LVS-a Srbac, kao i mještana.

Zahvalnica Opštine Srbac



Udruženje građana „C.E.Z.A.R.“ je, 14. Oktobra, na svečanoj ceremoniji povodom Dana i slave Opštine Srbac nagrađeno jednim od najvećih priznanja, Zahvalnicom Opštine. Zahvalnica je uručena za nesebičan rad na uređenju omladinskog parka, osvojene medalje na plesnim takmičenjima, organizovanje kreativnih radionica i razvoj djece i mladih.

Udruženje „C.E.Z.A.R.“ uspješno sprovodi brojne aktivnosti u radu sa djecom i omladinom svih uzrasta kroz neformalno obrazovanje, rekreativne, sportske i kreativne programe. U sklopu udruženja djeluje i Lokalni volonterski servis sa oko 350 volontera upisanih u bazu. Kroz ovo udruženje sedmično prođe i do stotinu mališana koji svoje stečene vještine prezentuju na raznim takmičenjima u zemlji i inostranstvu, odakle u svoj Srbac uvijek donesu hrpu osvojenih medalja.

Psihološko kreativni oktobar

U toku mjeseca oktobra, svakog petka su u udruženju organizovane psihološke radionice za učenike viših razreda osnovne škole. Radionice su sprovedene u saradnji sa osnovnom školom „Jovan Jovanović Zmaj“ iz Srpcu, a voditelj je bila Suzana Šarić, diplomirani psiholog i omladinski radnik udruženja.

Polaznici radionica su se upoznali sa pojmom emocija, te su pokušali opisati sebe i uvidjeti dobre i loše strane svojih ličnosti. Izuzetno je bitno raditi na psihološkom razvoju djece, naročito u ovom uzrastu.



Simboličan naziv ovog ciklusa radionica, „Psihološko-kreativni oktobar“, govori o kreativnom pristupu svim aktivnostima koje se sprovode u Udruženju građana „C.E.Z.A.R.“, a na ovaj način smo produžili dječiju nedelju, koja se održava prve sedmice u oktobru, na čitav mjesec.



H.O. MUSLIMANSKO DOBROTVORNO DRUŠTVO – MERHAMED DOBOJ

Ul. Kralja Aleksandra 17, 74000 Dobož
Tel./fax: +387 53 226 886
E-mail: merhamet.doboj@cutuk.net
FB: www.facebook.com/Merhamet-Doboj

Osim stalnih aktivnosti koje podrazumjevaju: Evidentiranje članarine, štampanje korisnicima molbi, žalbi, raznih dopisa, fotokopiranja, rada sa članovima, pružanja informacija, raspodjele humanitarne pomoći, izrada projekata i prisustvo seminarima, okruglim stolovima i drugim sesijama, Merhamet Dobož je tokom septembra radio na sljedećem:

06.10.2018 Izvršena je raspodjela humanitarne pomoći kojom je obuhvaćeno oko 300 korisnika. Aktivisti "Merhamet-a" se maksimalno trude da obezbijede koliko toliko prehrambenih proizvoda i sredstava za higijenu, kako bi pomogli najugroženijim članovima.



09.10.2018 Aktivisti "Merhamet-a" prisustvovali seminaru "Smanjenje faktora rizika za zdravlje u Bosni i Hercegovini", dio projekta Republika Srpska. Seminar je bio veoma poučan, govorilo se o savremenom problemu zdrave ishrane, kojim su posebno zahvaćena djeca školskog uzrasta ali i odrasli. Seminar je namijenjen prvenstveno majkama djece, kao domaćicama koje su i najodgovornije za zdravu ishranu svoje djece. Seminar tretira i nezdravu ishranu a posebno brzu hranu (fast food) koju djeca konzumiraju u školama, kao i pića čija je upotreba veoma raširena kod djece. U vremenu kada se više vodi računa da se hrana što brže pripremi i da

je što jeftinija, ne vodi se računa o bolestima koje nezdrava hrana prouzrokuje. Na ovom seminaru se upravo govori i o bolestima kao posljedicama nezdrave ishrane.

16.10.2018 Povodom Međunarodnog dana zdrave ishrane, JPU Majke Jugović organizovao je karneval zdrave ishrane koji se održao u gradskom parku gdje su bili prisutni aktivisti "Merhamet-a" Dobož i oduševili se kako su djeca različitih uzrasta sve pripremila. U okviru pomenute manifestacije prikazana je stručna prezentacija o pravilnoj ishrani, kulturno zabavni program, dodjela nagrada za najbolje likovne i literarne radove i izložba zdrave hrane.





12.10.2018 Predsjednica "Merhamet-a" Doboja, Avdić Faketa prisustvovala je Međunarodnoj konferenciji medijatora Jugoistočne Evrope pod nazivom „Medijacija – prilika za izgradnju dostojanstvenih odnosa u društvu“. Mreža za izgradnju mira je bila jedan od organizatora ove konferencije, a na poziv svoje članice iz Doboja, Centra za promociju civilnog društva. Konferencija je okupila medijatore i udruženja medijatora iz regiona, te organizacije civilnog društva i institucija iz Bosne i Hercegovine. Na konferenciji se najviše

govorilo o procesima i unapređenju medijacije, kao i o iskustvima u različitim zemljama. Pored toga govorilo se o budućoj saradnji medijatora u regionu, ali i o saradnji medijatora sa organizacijama civilnog društva, te korištenja medijacije u mirovnim procesima.

23.10.2018 - Održan je sastanak Lokalne akcione grupe grada Doboja, gdje je bila prisutna predsjednica "Merhamet-a" Avdić Faketa. Radi se o projektu Ministarstva zdravlja "Politikom bez duvanskog dima", izrada nacrta politika, zdravo radno mjesto, zatim informacije o grantovima. Lokalne akcije kao što su peticije, kontrola javnih prostora bez duvanskog dima od strane građana, kontrola prodaje duvana maloljetnicima i slično mogu biti od koristi, u smislu lobiranja za punu primjenu zakona u praksi.



26.10.2018 Aktivisti "Merhamet-a" prisustvovali su svečanosti otvaranja ovogodišnjeg Naučno-istraživačkog kampa, u sali gradske Skupštine. Nakon toga, mladi su autobusom krenuli put Tjentišta, gdje će se kamp održati u periodu od 26 – 29. oktobra 2018. godine. Bilo nam je zadovoljstvo što smo prisustvovali svečanom otvaranju Kampa.



Institut za
razvoj mladih KULT



Ul. 4. Viteške brigade
34 – 36 BA, 71210 Ilidža,
Sarajevo
Tel: +387 33 778 778.
Fax: +387 33 778 79
E-mail: kult@mladi.org,
web: www.mladi.org

Imate ideju kako uz našu pomoć poboljšati vašu zajednicu?

SNAGA LOKALNOG
IMATE IDEJU KAKO UZ NAŠU PODRŠKU
POBOLJŠATI VAŠU ZAJEDNICU?



WWW.SNAGALOKALNOG.ORG



Institut za razvoj mladih KULT | MLADI.ORG

Institut za razvoj mladih Kult tokom oktobra je u Bihacu, Ljubuškome i Trebinju predstavio novu inicijativu "Snaga lokalnog", namijenjenu svim građanima koji imaju ideju kako poboljšati stvari u svojoj lokalnoj zajednici, a rezultat posjeta su inicijative građana koje će lokalnu zajednicu zaista učiniti boljom.

Predložene su inicijative za uvođenje novih autobuskih linija, uređenje autobuskih stajališta, atletske staze, ali i brojne druge koje bi lokalnom stanovništvu trebale poboljšati kvalitet života.

Stotine građana imale su priliku govoriti o problemima u svojoj lokalnoj zajednici, predložiti inicijativu koju žele sami realizovati, ali i saznati detalje o samoj inicijativi „Snaga lokalnog“.

Inicijativa Snaga lokalnog pomaže i podržava lokalne zajednice u BiH da prepoznaju resurse i potrebnu podršku kako bi radili na rješavanju problema u samim zajednicama.

Institut će kroz inicijativu Snaga lokalnog pomoći lokalnim organizacijama, neformalnim grupama ili pojedincima/kama kako da pronađu rješenje za probleme koje su sami prepoznali u svojoj zajednici. Kroz ovu inicijativu svi građani/ke mogu prijaviti probleme koje žele riješiti u svojim lokalnim zajednicama, nudeći konkretne prijedloge za rješenja, koristeći lokalne resurse i povezujući se sa drugim akterima svoje zajednice.

Inicijativom Snaga lokalnog bit će obuhvaćene 32 lokalne zajednice iz BiH, a mogu se obratiti svi građani, fizička i pravna lica, te neformalne grupe koji su prijavljeni u lokalnim zajednicama koje su u ovom programu, a to su: Bihać, Bosansko Grahovo, Bosanska Krupa, Bosanski Petrovac, Berkovići, Bileća, Bužim, Cazin, Čapljina, Čitluk, Drvar, Gacko, Glamoč, Grude, Istočni Drvar, Istočni Mostar, Ključ, Krupa na Uni, Kupres, Ljubinje, Ljubuški, Neum, Nevesinje, Novi Grad, Petrovac, Posušje, Prozor/Rama, Ravno, Ribnik, Stolac, Trebinje i Velika Kladaša.

Snaga lokalnog nije isključivo program finansijske podrške, nego prvenstveno inicijativa povezivanja aktera u lokalnim zajednicama koji će surađivati u rješavanju konkretnog problema zajednice, uključujući lokalno stanovništvo u potencijale, te stavljajući potrebe stanovništva na prvo mjesto.

Inicijativu Snaga lokalnog zajedno provode USAiD BiH i Institut za razvoj mladih KULT.

Građani/ke informacije o tome kako predložiti i osigurati podršku, mogu pronaći na www.snagalokalnog.org

Otvoreni javni pozivi za finansiranje najboljih poslovnih planova mladih u okviru Preduzetničkog fonda za mlade.

U oktobru su otvoreni javni pozivi za finansiranje najboljih poslovnih planova mladih u pet jedinica lokalne samouprave u BiH, i to u Općini Stari Grad Sarajevo, Općini Jajce, Opštini Teslić, Općini Novi Travnik i Općini Centar Sarajevo.

Javni pozivi su raspisani u okviru Preduzetničkog fonda za mlade udruženim sredstvima jedinica lokalne samouprave i Instituta za razvoj mladih KULT, uz podršku Ambasade Kraljevine Švedske u BiH, namijenjenih razvoju preduzetništva i zapošljavanju mladih sa područja osam općina i gradova.



Ukupan iznos Preduzetničkog fonda za mlade iznosi oko 400.000 KM, te se očekuje da će njime biti podržano od 50 do 100 biznisa mladih ljudi. U narednom periodu se očekuje raspisivanje javnih poziva u Cazinu, Trebinju i Modriči.

Institut za razvoj mladih KULT će zajednički sa navedenim Općinama i Gradovima u narednom periodu održati informativne radionice za sve mlade osobe koje su zainteresirane za prijavu na javne pozive. Informacije o javnim pozivima i informativnim radionicama mladi mogu pronaći na web portalima Općina i Gradova, te putem društvenih mreža Instituta.

Gračanica: Poslodavci i mladi trebaju raditi zajedno.



Više od 50 % mladih iz Gračanice posao namjerava tražiti izvan Bosne i Hercegovine, pokazala je anketa koju su mladi u ovoj lokalnoj zajednici realizovali u okviru lokalne građanske inicijative „Mladi za mlade“. Rezultati ankete koji su 9. oktobra 2018. godine predstavljeni u Gračanici tokom događaja Dan „D“ pokazali su i da se većina mladih, njih 57%, za pet godina vidi izvan granica zemlje.

Provođenje ankete bila je jedna od aktivnosti inicijative „Mladi za mlade“, a događaj Dan „D“ svojevrsan odgovor na ovakve rezultate ankete među mladima iz Općine Gračanica i poveznica između mladih i poslodavaca.

U gračanici je oko 7.000 nezaposlenih mladih i moramo im pomoći da pronađu svoj put – poruka je koja je upućena sa događaja „Dan D“ koji je za cilj imao ukazati mladima na sve mogućnosti koje im se pružaju u procesu pronalaska posla, ali ih i uvezati sa potencijalnim budućim poslodavcima. Dan D okupio je najznačajnije privrednike i potencijalne buduće poslodavce i mlade ljude, posebno srednjoškolce koji su na prekretnici izbora budućeg zanimanja.

"Tražio sam aktivno posao, ali prilikom mnogih apliciranja nisam dobio niti odbijenicu. Tužan sam zbog ove činjenice, ali nisam odustao. Posao sam našao, ne u struci, ali sam našao." - istakao je Ajdin Topčagić, mlada osoba koja je u okviru ovog dešavanja odlučila govoriti o problemima mladih u ovoj općini.

Inicijativu mladi za mlade pokrenula je neformalne grupe mladih iz Gračanice, a realizuje se u okviru lokane građanske inicijative koju je podržao i Institut za razvoj mladih KULT.

„U Bosni i Hercegovini postoje mladi ljudi koji nisu niti jedan dan bili na evidenciji biroa za zapošljavanje i vjerujem da i među vama ima onih koji će imati sličan put. Vjerujte u sebe, u svoje znanje i nemojte se bojati preuzeti inicijativu i tražiti svoju priliku.“ – poručila je Nejra Neimarlija Roić iz Instituta za razvoj mladih KULT.

Kako je istaknuto tokom razgovora mladih i poslodavaca, svijest o problemu velike nezaposlenosti ove populacije postoji, ali i o hitnosti reakcija i iznalaženju rješenja.

Privrednici i poslodavci pozvali su mlade da biraju škole i fakultete za kojima postoji potreba na tržištu rada, ali i da više energije ulažu u sticanje znanja kako bi bili konkurentni. Mladi su tokom razgovora ukazali na brojne probleme s kojim se suočavaju prilikom zapošljavanja.

BiH treba mlade političare



Mladima treba kreirati mogućnosti za uključivanje u politiku Bosne i Hercegovine. Drago mi je što danas mogu ne samo razgovarati nego i slušati mlade političare u Bosni i Hercegovini - poručio je na Kafi sa polaznicima/ama obuke „Uči, misli i djeluj!“ za omladinske političke lidere/ice (UMiD p), H.E. Anders Hagelberg, ambasador Kraljevine Švedske u Bosni i Hercegovini, koja

je u oktobru organizovana u Sarajevu, a u okviru posljednjeg modula obuke.

Obuku je u prethodnom periodu pohađalo 26 mladih političara, iz 9 različitih političkih stranaka, koji su sticali znanja i vještine, te razvijali kapacitete za davanje prioriteta pitanjima mladih na agendama/programima političkih stranaka, razumijevajući politički sistem u BiH, ali i izazove ekonomskog i socijalnog razvoja.

„Tokom obuke smo tražili načine da svoje ideje i politike predložimo nekim institucijama koje su nadležne za ta pitanja, ali i naučili da kad sutra sjednemo u zastupničke klupe znamo pronaći rješenja za mlade, jer mi smo ti mladi politički lideri i cilj nam je poboljšati status mladih u Bosni i Hercegovini.“ – naglasio je Belmin Zukan, polaznik obuke.

Polaznici/e su tokom obuke učili i o ljudskim pravima, rodnoj ravnopravnosti i demokratskim procesima za unaprjeđenje pozicije mladih kroz razvoj jasnih strategija i vođenje uspješnih zagovaračkih kampanja.

Cilj je motivisati mlade političare da aktivnim zalaganjem, lobiranjem kod vlasti, riješavaju neke od problema ove populacije u svojoj lokalnoj zajednici i na taj način daju primjer mladim ljudima i političarima o koliko je važna politička participacija i aktivno djelovanje.

Obuka „Uči, misli i djeluj!“ za omladinske političke lidere/ice (UMiDp) realizuje se uz podršku Ambasade Švedske u BiH.



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice

Omladinska organizacija Svitac je u oktobru nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Mlađi učesnici su pravili origami gusjenica, zec i žir. Takođe su imali par tematskih radionica na temu domaće životinje i zaštita životinja. Na muzičkim radionicama su učili i vježbali pjesmicu „Vjeverica“, koju su izvodili uz pomoć makaton jezika.

Materijal korišten na radionicama je karton u boji, kolaž papir, drvene i masne bojice, makaze, ljepilo, šljokice, drveni štapići, dekorativni i ukrasni papir, plastelin, vuna. Drugi dio radionice je namijenjen za relaksaciju, osvježenje, jogu, sportske i razne takmičarske igre. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.

Učesnici druge radionice (14:00-15:30), za uzrast 8+, su vrijedno učestvovali u raznim aktivnostima. Ponedjeljkom je kreativno izražavanje na kojima su učesnici i ovaj mjesec pravili kreacije koristeći razne materijale. Kao i jutarnja grupa i ovi učesnici su pravili edukativne i maštovite dekoracije na temu galaksija, te su imali priliku osmisliti svoju galaksiju iz snova. Utorkom su učesnici vježbali engleski jezik i svakodnevnu komunikaciju, te razne igre koje poboljšavaju učenje engleskog u grupi i timski rad. Pored ovih aktivnosti, učesnici su i ovog mjeseca na muzičkim radionicama radili sa boomwhakersim-a te vježbali različite ritmove, a imali su i priliku upoznati se sa samba perkusijama. Srijedom su održane radionice turskog jezika sa osnovama za upoznavanje. Četvrtkom su se družili uz sportske aktivnosti i teambuilding igre, a petkom su nastavili raditi na radionicama njemačkog jezika (interkulturalna razmjena Njemačka/Bosna i Hercegovina). Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugima i usvoje lijepo ponašanje. Koordinator radionica u oktobru je bio Adin Midžić uz asistenciju lokalnih, Weltwärts, Erasmus+ i „Love Volunteers“ međunarodnih volontera. Sve aktivnosti se održavaju u Omladinskom centru Brčko distrikta.

Radionica gitare

Učesnici radionice gitare su početkom mjeseca utvrđivali prethodno usvojeno gradivo, a u drugoj polovini mjeseca uvježbavali nove tehnike, etide i kraće kompozicije.

Radionica sambe

Učesnici ove radionice su radili na dvije nove kompozicije. Prva, „The Builder“, kao osnov ima brazilski ritam „Partido Alto“, a druga, „No-Go-Agogo“, je bazirana na triolskoj ritmičkoj figuri.

Weltwärts South-North Partner Konferencija 2018.

U periodu od 10. do 16. septembra održana je četverodnevna konferencija za Weltwärts partner organizacije u Berlinu. Projektni koordinator Omladinske organizacije Svitac Miloš Popić je prisustvovao konferenciji kao jedan od partnera iz Evrope. Tokom konferencije svi partneri iz Afrike, Azije, Južne Amerike, Europe i Oceanije su imali priliku dublje razviti svoja partnerstva i pričati o daljim koracima u

programu te poboljšanju kvaliteta programa prije, tokom i poslije volonterskog servisa. Koordinator iz različitih zemalja ovog programa su takođe predstavili njihova mišljenja i učestvovali u velikom broju prezentacija i radionica koje su se odnosile na dostignuća i novine u programu koje su pripremili koordinatori/predstavnici Weltwärts programa. Preko 70 partnerskih organizacija prisustvovalo je konferenciji.


Nakon konferencije učesnici su prisustvovali proslavi 10 godina Weltwärts programa koja se održala 15-og septembra u Berlinskom Kongres Centru.

Weltwärts volonterski program je Savezno ministarstvo za ekonomsku saradnju i razvoj Njemačke osnovalo 2008. godine. Od tada pa sve do danas preko 35 000 hiljada mladih ljudi otputovalo je u Afriku, Aziju, Južnu Ameriku, Europu i Oceaniju.

Od 2013. godine, tu mogućnost dobili su i mladi iz njihovih partnerskih zemalja, te već 5 godina odlučuju provesti godinu dana volontirajući u raznim organizacijama širom Njemačke. Kompetencije koje volonteri dobiju tokom svog boravka u stranoj zemlji ostaju im tokom čitavog života i motivišu ih da se razvijaju kao individue te malim koracima mjenjaju svijet i čine ga boljim.



Evropski dan jezika



Omladinska organizacija Svitac obilježila je Evropski dan jezika kreativnim radionicama, čiji je cilj bio promovisanje važnosti komunikacije i jezika, ali i vrednovanje svih jezika i kultura. Na radionici za učesnike uzrasta 4-7 godina je održana pokazna vježba komunikacije bez korištenja riječi. Zatim su učesnici poslušali pjesmu prilagođenu njihovom uzrastu pod imenom "Hello around the world" gdje su imali priliku čuti riječi pjesme na 15 različitih jezika.

Poslepodnevna grupa je imala priliku da sazna nešto više o

brojnosti jezika u Evropi. Imali su priliku da više nauče o porijeklu jezika koje pričaju naši internacionalni volonteri, koji dolaze iz Amerike, Turske, Holandije i Njemačke. Aktivnosti koje su sljedile nakon toga su učenje određenih fraza na jezicima koje pričaju internacionalni volonteri za video koji su pravili u toku radionice.

Međunarodni dan nenasilja (02.10.)

Međunarodni dan nenasilja se obilježava na dan rođenja Mahatme Gandi, jednog od začetnika filozofije i strategije nenasilnog otpora. Omladinska organizacija Svitac je organizovala radionice, metodički prilagođene uzrastu, na kojima su učestvovala dvije grupe učesnika. Cilj radionica je bio da se promoviše važnost svjetskog dana protiv nasilja, te važnost poštovanja i različitosti kultura. Educirajući djecu i mlade da razbijaju predrasude i stereotipe prema svojim vršnjacima, o miru i nenasilnom rješavanju sukoba, usmjeravamo ih kreativnim, preventivnim i strukturiranim sadržajima. Na taj način će djeca u svojim vršnjacima umjesto svađa i sukoba pronalaziti prijatelje.

Mlađi učesnici su imali priliku da nauče brojalicu mira, jedna od lokalnih volonterki je pročitala priču o Mahatmi Gandi, te su učesnici pogledali međunarodne znakove protiv nasilja. Od plastelina su pravili znak mira.



Poslepodnevna grupa je takođe imala diskusiju prilagođenu njihovom uzrastu na temu vršnjačko nasilje, mržnja govora na internetu, te su pogledali znakove mira iz zemalja iz kojih dolaze međunarodni volonteri Omladinske organizacije Svitac (Njemačka, Holandija i Turska). Takođe je rađena vježba, kako bi se ukazalo na rješavanje problema nenasiljem.

Za novembar se planira nastavak svih redovnih radionica Omladinske organizacije Svitac.



INFORMACIJE / DONATORI / POZIVI

Ambasada Republike Češe u Sarajevu objavljuje otvaranje poziva za dostavljanje prijedloga u okviru „Fonda za izazove Češkog-UNDP partnerstva“

Cilj fonda pod nazivom “Challenge Fund: češka rješenja s ciljem održivog razvoja” (u nastavku samo CFCS) je posredovati u prenosu češkog znanja i inovativnih rešenja koja će se fokusirati na razvojne izazove koje su identifikovale kancelarije UNDP-a u partnerskim zemljama (BiH) i doprinijeti dostizanju SDG-a. Fond traži inovativna rješenja sa dodanom vrijednošću koja će posebno uključiti nove metode, ideje ili proizvode.

Prihvatljivi kandidati mogu dolaziti iz češkog privatnog sektora, nevladinih organizacija, univerziteta, državnih institucija ili istraživačkih centara. Podnosioci zahtjeva su obavezni da angažuju lokalne partnere kako bi osigurali izvodljivost u lokalnim uslovima i promovisali održivost i naknadne primjenljivosti rješenja.

Detaljnije informacije možete pronaći na linku [UNDP](#) ili [UNGM](#).

Tema za BiH: *Ubrzavanje ekonomskog rasta kroz tehnologiju i efikasno upravljanje prirodnim resursima*

Očekivani datum početka ugovora: Novembar 2018

Očekivana dužina trajanja ugovora: do 1 godine

Procijenjeni troškovi: između US \$ 20,000 i US \$ 40,000, učešće aplikanta min. 20% od ukupnog budžeta projekta.

Svoje prijedloge možete slati putem e-maila (svi traženi dokumenti u PDF formatu, maksimalna veličina 10MB) na: cup.applications@undp.org najkasnije do 12. novembra 2018 (22:00 CET) (GMT + 1 sat).

Objavljen poziv za prijavu projekata Erasmus+ programa za 2019. Godinu.

Evropska komisija objavila je 24.10.2018. godine poziv za prijavu projekata u okviru Erasmus+ programa za 2019. godinu.

Poziv je dostupan na web stranici: https://eur-lex.europa.eu/legal-content/EN/TXT/?uri=uriserv:OJ.C_.2018.384.01.0004.01.ENG&toc=OJ:C:2018:384:TOC

Vodič za program Erasmus+ za 2019. godinu objavljen je na engleskom jeziku na sljedećoj web stranici: https://ec.europa.eu/programmes/erasmus-plus/resources/programme-guide_en

Saopćenje Evropske komisije možete pronaći na sljedećem linku: http://europa.eu/rapid/press-release-IP-18-6170_en.htm

PRO-Budućnost: Javni poziv za male grantove.

Projekat PRO-Budućnost u kontinuitetu osigurava bespovratna sredstva za inicijative koje doprinose procesu pomirenja i izgradnje povjerenja u BiH, zagovaraju za mir i kolektivnu viziju za stabilnu budućnost i povezuju lokalne zajednice.

Na javni poziv mogu se prijaviti: udruženja mladih, neformalne grupe mladih, udruženja žrtava rata, Crkve i vjerske zajednice kao i nevladine organizacije usmjerene promovisanju međureligijskog dijaloga, organizacije civilnog društva i općine / opštine / gradove u kojima se provodi projekat PRO-budućnost.

Ove godine se od aplikanata očekuje da svoje ideje i prijedloge kreiraju u skladu sa Platformom za mir koja je rezultat intenzivnog i dugotrajnog rada projekta PRO-Budućnost u lokalnim zajednicama u BiH.

USAID-ov projekat PRO-Budućnost provodi Catholic Relief Services (CRS) u saradnji s Caritasom BiH, Institutom za razvoj mladih KULT, Međureligijskim vijećem BiH (MRV), Forumom građana Tuzla (FGT), Helsinškim parlamentom građana Banjaluka (hCA) i Nansen dijalog centrom Mostar (NDC).

Oblasti javnih poziva

Projektni prijedlozi moraju se odnositi na izgradnju mira i jačanja povjerenja u Bosni i Hercegovini.

Sredstva, tj. mali grantovi će biti na raspolaganju za sljedeće oblasti/aktivnosti/inicijative:

- Podrška mladima
- Podrška organizacijama civilnog društva
- Podrška organizacijama žrtva rata
- Podrška Crkvama, vjerskim zajednicama i organizacijama usmjerene promovisanju međureligijskog dijaloga
- Mali grantovi za inicijative općina/opština/gradova

Svu potrebnu dokumentaciju i tekstove javnih poziva možete pronaći na slijedećim linkovima:

IRD

[Javni poziv za međureligijski dijalog](#)

[Instrukcije za međureligijski dijalog](#)

[Obrazac za projektne prijedloge IRD](#)

MLADI

[Javni poziv mladi](#)

[Instrukcije mladi](#)

[Obrazac za projektni prijedlog mladi](#)

OCD

[Javni poziv OCD](#)

[Instrukcije OCD](#)

[Obrazac za projektni prijedlog OCD](#)

Općine

[Javni poziv općine opštine gradovi](#)

[Instrukcije općine opštine gradovi](#)

[Obrazac za projektni prijedlog općine opštine gradovi](#)

Žrtve rata

[Javni poziv žrtve rata](#)

[Instrukcije žrtve rata](#)

[Obrazac za žrtve rata](#)

[Obrazac za budžet](#)

[Obrazac za budžet](#)



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:
**Omladinski resursni centar
Tuzla**

**Hadži Bakirbega Tuzlića 1
75000 Tuzla**

tel/fax: 035 258 077

**e-mail: orcuzla@bih.net.ba
hcatuzla@bih.net.ba**

*Mjesečni bilten uređuje
Omladinski resursni centar -
ORC Tuzla*

*Prevod Biltena na engleski: Emir
Karamujić*

*WEB stranica Mreže:
www.omladina-bih.net*

*Mejling lista Mreže:
posta@omladina-bih.net*

*Webmaster:
emir.delalic@gmail.com*